

SAN PEDRO PAVILJOEN LO AMPLIA SU CAPACIDAD PA OTRO AÑA



Fuera di e maneho di St. Michael Paviljoen Fundacion SABA a haya acerca recientemente, e maneho di San Pedro Paviljoen, cu hunto cu Huis Maris Stella y Cas di Anciano di San Nicolas, ta forma e tres institucion pa cuidu di anciano cu SABA tin na su encargo.

En conexion cu Dia Internacional di Anciano, esta Diadomingo 1 di October awor, DIARIO a bishita San Pedro Paviljoen unda a conversa cu 3 miembro di staf, esta, Felipe Solognier, director interino; Sra. Bea Nicolaas, cabesante; y Sra. Sandra Courtar.

Felipe Solognier ta splica cu dia 23 di Juli SABA a tuma San Pedro Paviljoen over,

despues di un temporada cu e institucion tabata bao maneho di Stichting di Hospital.

"SABA ta conta awor cu 3 cas di anciano. Un na Playa, otro na Savaneta y un na San Nicolas. San Pedro Paviljoen nos a pone como un dependencia di St. Michael Paviljoen.

Pa drenta San Pedro nos a tuma over 28 persona cu tabata kedando na Hospital, y for di e otro paviljoen nos a tuma 29 hende di St. Michael, cu den total nos tin mas of menos 57 cliente akiden".

San Pedro Paviljoen tin un capacidad di cien cama aworaki pero actualmente e lugar no ta completamente

equipa.

"E meta ta pa nos ta haya mas hende grandi despues, pero pa awor nos no por tuma mas hende pa motibonan financiero. Si nos tuma mas hende grandi aworaki nos mester pone mas trahado loke no ta posible ni pa fin di aña aki, pero te cu otro aña esaki ta bin na vigor".

Cu otro palabra, San Pedro Paviljoen tin caminda pa extende den futuro, pero mester cubri cierto necesidadnan prome cu haci esey.

"E posibilidad pa nos bira mas grandi ta cu nos ta bay haya e lugar bieu (St. Michael) cu lo worde bon drecha, lo elimina e murayanan

cu ta dividi e parti ey di San Pedro, y e lo bira un solo compleho cu su plantacion bunita drecha, un cambio di ambiente total, pero semper cu nos por haya ayudo di Hulanda pa realiza esaki". Hulanda ta dispuesto pa yuda SABA den e proyecto aki, segun Solognier ta menciona.

Tambe e ta señala cu e grandinan tabata anhela pa San Pedro Paviljoen habri pa nan drenta eyden, y di hecho esnan cu tey ta sinti hopi mas comfortable y nan ta haya e lugar hopi bunita mes.

TRABAO CU GRANDINAN

Traha cu grandinan no ta un tarea facil, y e ta encera hopi aspecto diferente na cuidu normal di pacient, den un hospital.

Bea Nicolaas tin un comentario al respecto, cual tambe ta worde amplia pa Sandra Courtar den articulo aparte di "Nos Hendenan Special".

Sra. Nicolaas ta señala: "Ta hopi sacrificio bo tin cu haci pa drenta den e ramo di trabao aki. Bo mester tin hopi pasenshi y hopi cariño pa duna tambe.

Pasobra hopi biaha hende grandi, ora nan drenta akiden nan ta keda pa basta tempo y tin di nan ta bin pa fayece. Amor ta hopi importante pa haci e trabao aki". Un dosis hopi grandi di comprension pa e necesi-

dadnan fisico y moral di anciano mester tin pa asumi cuidu di anciano, pasobra e enfermera ta bira tur cos pa nan, tanto e persona pa confia nan problemanan pero tambe esun riba cual desahoga hasta un tiki mal humor, ora e grandi ta pasando momentonan duro aden.

"Nan tambe tin problema, nan tambe ta consumi un poco, nan tambe ta sensible, y e ora ey bo como trahador di cas di anciano mester bira hopi mas humano pa carga esey".

Esaki ta pone cu nan mester di hende adecua y capacita pa cuida nan.

Entre tur e aspectonan cu mester tene cuenta cu nan den cuidu di anciano ta cu nan no ta hende cu ta bay padilanti mas, pero cada aña ta conta. Tempo pa nan ta limita conforme nan edad ta subi y den e temporada ey nan animo tambe ta cambia. San Pedro Paviljoen ta un compleho basta grandi cu a worde parti den dos seccion, pa facilita e atencion pa e grandinan den sentido di tin mas contacto y mehor control. Cada seccion tin un enfermera na cabes. Fuera di esey tin e parti di edificio bieu cu ta St. Michael Paviljoen.

Na San Pedro Paviljoen tambe tin cliente bao di 60 aña cu ta esnan cu nos a tuma over for di Hospital cu ta worde trata clinicamente eyden tambe.